

PAMERAN PENYELIDIKAN 'MOCK' ITEX KUKUM 2006

DYMM Tuanku Syed Faizuddin Putra Ibni Tuanku Syed Sirajuddin Jamalullail, Pemangku Raja Perlis yang juga merupakan Canselor Kolej Universiti Kejuruteraan Utara Malaysia (KUKUM) telah sudi bercemar Duli berangkat ke ke Pameran Penyelidikan 'Mock' Itex KUKUM 2006 sebagai tanda sokongan baginda kepada para penyelidik yang akan menyertai pertandingan ITEX peringkat kebangsaan tidak lama lagi.

Pameran yang diadakan ini sebagai persediaan untuk menyertai pertandingan ITEX 2006 yang akan berlangsung di Kuala Lumpur pada 19-21 Mei 2006. Penyertaan oleh para penyelidik dari pelbagai pusat pengajian di pameran ini telah



menjadi satu kemestian bagi mereka sebelum menyertai pertandingan ITEX peringkat kebangsaan. Setiap penyelidik yang akan menyertai pertandingan penyelidikan dikehendaki mempamerkan produk masing-masing sebagai persediaan sebelum ke pertandingan sebenar.

Menurut Rektor KUKUM, Lt. Kol. Prof. Dato' Dr. Kamarudin Hussin, pameran ini dijadikan sebagai landasan kepada pihak urusetia dan pengurusan KUKUM untuk memastikan semua produk yang bertanding di ITEX 2006 sudah bersedia sepenuhnya. Selain memberi peluang kepada penyelidik KUKUM untuk mempamerkan hasil penyelidikan masing-masing ianya juga untuk memberi pendedahan kepada penyelidik baru untuk merasai suasana pertandingan sebenar yang akan berlangsung kelak di samping menguji tahap atau keupayaan sesuatu produk itu sebelum ke pertandingan sebenar.

Sempena dengan Mock ITEX 2006, sebanyak 33 produk KUKUM telah menyertai pameran ini. Dalam pengisian 'mock' ini juga, ceramah dan taklimat penyelidikan juga telah diadakan oleh penceramah jemputan. Pameran Penyelidikan 'Mock' Itex KUKUM 2006 ini diadakan oleh Unit Penyelidikan & Pembangunan dengan kerjasama Pejabat Timbalan Rektor (Penyelidikan & Inovasi) serta Unit Pengurusan Kluster Penyelidikan KUKUM telah berlangsung di Ruang Legar, Bangunan KWSP pada 15 Mei 2006.

